




D. O. M.



DISSERTATIO
ANATOMICO-CHIRURGICA

DE Radium superioris extremitatis dimotione in infantibus frequentiori.

FRACTURIS sæpiùs quàm luxationibus laborare pueros constat, ab hoc tamen morbo non prorsùs immunes sunt. Frequentissima enim, eà ætate, Radium superioris extremitatis dimotio: de quâ

A



dicere cùm aggrediamur, partium anatomen breviter præmit-
temus.

EX ANATOMIA.

In inferiori humeri extremitate, anteriùs & posteriùs paululùm complanatâ, quatuor apophyses reperiuntur: duæ longiùs à se remotæ, articuloque nihil inservientes condyli dicuntur, externus alter, alter verò internus. Inter hos condylos prominet internè cochlea, externè parvum humeri caput: illa cubito, hoc Radio respondet, utrumque cartilagine obducitur.

Radii superior extremitas in caput definit, cùs summitas leviter excavatur, dùm in periphæriâ cylindrico terminatur ambitu, internè & posteriùs magis prominenti; sustentatur collo brevi, versùs exteriora parùm incurvato: cartilagine undique levigatur, & summitate depressâ parvum humeri caput recipit, dùm ambitu prominenti in parvâ cubiti cavitare sigmoïdeâ recipitur.

Vario ligamentorum apparatu radius in suâ sede continetur; in hoc enim valdè complicato articulo alia communia sunt, alia propria, & quatuor recensentur, nempe capsulare, lateralialia duo, & annulare, ex quibus tria tantùm aliquam cum Radio connexionem habent, capsulare scilicèt, annulare & laterale externum.

Capsulare ligamentum ossium capita latè ambit, & tria ossa communi continet articulo: tanquàm membrana coercendæ synovix dicata considerari potest, aut veluti substratum quoddam quo ceteræ seu ligaminum seu muscutorum, fibræ commodiùs inseruntur.

Lateralialia ligamenta utrinque à condylis descendunt: primò in

funiculos coacti, mox in plures fibrarum fasciculos dividuntur, explicantur, dilatantur, & ad ossa postbrachii vergunt, ita tamen ut externum non ad Radium usque protendatur, sed ligamento tantum capsulari adhæreat: hinc variis tendinibus firmiter adstringitur, & ita cum iissem connectitur, ut a quibusdam pro eorundem tendinum continuatione habitum fuerit.

Annulare ligamentum in cartilagineam ferè substantiam indurefcens, ab extremitatibus parvæ cavitatis cubiti sigmoideæ oriundum, ad radium transversè fertur, ejusque caput circumcingit.

Duplici motu gaudet Radius: nempe cum, flexo alternis & extenso post-brachio, cum cubito simul abripitur, nullus aut ferè nullus inter capitis ambitum & parvam cavitatem sigmoideam motus adest, sed depressum ejus caput in vicinam humeri cochleæ eminentiam decurrit: cum verò supinus pronusve circa cubitum illabitur, tùm lateralis inter os utrumque post-brachii ginglymus adest, dùm Radii caput in humeri parvo capite velut in axi rotatur.

Varii ad varios illos motus exercendos inserviunt musculi, quorum figuram, situm, compositionem, insertiones, connectionem & usus præsentis sermone, ne longius hoc programma protrahatur, exponere conabimur.

E C H I R U R G I A.

Apud sibi respondentem ossium connexionem, ligamentorumque quibus confirmatur articulus numerum & robur attentè consideranti cuilibet difficilis admodum videbitur.

7

Superioris Radii extremitatis dimotio; & quidem in adultis rarissimè occurrit: in infantibus verò, cum multò debilior, remissiorque sit eorundem ligamentorum compages, cum præsertim annulare ligamentum quod ætate provectiori cartilaginis ferè naturam induit, tum laxa potiùs membrana videatur, cum tandem molliores adhuc partes numerosioribus irrorentur vasis quæ majorem iis flexibilitatem conciliant, non mirum si levi de causâ sæpiùs oriatur. Sed quid sit? Paucis ut plurimum stipatur accidentibus: ferè nulla partium deformitas, nullus tumor, dolor tolerabilis, motus adhuc plurimi exercentur: hinc faciliè in errorem delapsus Chirurgus nihil adesse mali pronuntiat: Ossa proindè dimota remanent, & tunc tantùm res quæ sit agnoscitur, cum reductionis spes omnis evanuit. Licet igitur in tenui labor forsan videatur, non in vanum omninò insudavisse putabimus, si frequentem minùsque notum morbum certâ diagnosi, propriâque curatione insigniverimus.

Titubanti gressu incedens puer, seu fallente vestigio, seu ipsâ crurum debilitate sexcenties in die labitur: & sæpè ipso lapsu, aut sæpiùs etiã dùm incautiùs è terrâ sublevatur, Radii superior extremitas ab humero simul & cubito dimovetur (1). Id fit autem, quia promptiùs auxilium daturus adstans quilibet unam tantùm infantis manum apprehendit, eumque Radio in cubitum prono, ab humo tollit, proindè quæ illud os ultrà modum in naturalem pronationis sensum abripitur, ità ut inferiori extremitate depressum, cubitoque medio, quantum fieri potest, innixum, alterâ extremitate promineat, & è suo dejiciatur artu.

(1) Idem accidit, cum strictiores induendæ sunt vestes, puerique pronæ manus in manicas violentius, & nullâ cautelâ adhibita, impellitur.

§

tulo: ac demùm extenso, per vim illatam, annulari ligamento, à parvâ cubiti cavitare sigmoïdeâ depellitur Radii capitis ambitus, ipsiusque caput humeri eminentiam relinquit, deindèque, prout hùc aut illuc ictus impulsusve dirigitur, prout plùs minùsve contrahuntur muscoli, ac tandem ex vario ligamentorum juncturam ambientium robore, aut extùs aut anteriùs fertur, sed ità tamen ut à situ naturali parùm distet (1).

Levia primùm levem dimotionem comitantur symptomata; nam, si supinationem excipias, æger qui parùm aliundè doler, omnes ferè post-brachii motus liberè exercere potest; sed graviùs, si dimota remanserint ossa, ingruit detrimentum. Ligamenta enim ultrà tonum extenduntur; musculorum mutatur directio, vicinæque comprimuntur partes: hinc vasorum ingurgitatio, cellulosa telæ ab effusis humoribus infarctio, synoviae effusio, vel, imminuto motu, condensatio, concretio; ac tandem ossa contrà naturam conglutinantur, omnisque juncturae intercipitur motus. Tristius etiam quandòque minatur malum, in morbum enim qui scrophulum æmulatur nonnunquam degenerat, ut testatur celeberr. D. Duverney, ut nos ipsi pluriès vidimus. Ex his patet quantopere morbum, qui neglectus tam gravis evadit, cognitus verò nullo ferè negotio curatur, adprimè dignoscere conducatur; sequentibus autem signis se prodit.

Post ictum, lapsum, nifumve quemlibet, aut violentiorem

(1) Hic videtur quantum celeberr. Duverney qui primus hanc luxationis speciem descripsit opinioni advessemur: clariss. enim ille vir ab humero tantùm dimoveri Radium contendit, laterali ipsius articulo integro & illaeso remanente: sed anatomicis cognitionibus studiosè revocatis, morbiq; accidentibus, ut & ossa reducendi modo ritè & sedulo perpensis, nostra, si dicere fas est, potior sententia videbitur. Vid. Duverney, lib. 2. pag. 181.

6
manus in pronationis sensum inversæ contorsionem, statim ab omni supinationis motu cautus abstinere puer; post brachium semi-flexum, manusque prona remanet: si quid ori ferre cogatur infans, carpi juncturam quàm maximè flectit, caputque inclinatur, ita ut ad manum potius demitti, quàm manus ad caput elevari videatur: si in supinationis sensum vergat manus, dolorem clamoribus prodit eò acutioribus, quò fortius aut diutius tentatur motus, hoc autem cessante, cessat dolor; noctu verò identidem vagitus edit puer, quòd nempe brachium imprudens per somnum moveatur, doloresque motibus revocet. Pro certissimo igitur indicio habendum est, quòd prona semper manus, absque magno dolore supinari nequeat: nam si commemorativa revocentur signa, proindeque attendatur non sensim & per gradus subrexisse malum, sed subito post læsionem externam motus impeditos fuisse, & à scrophulo, & ab articuli infarctione, & à quolibet alio morbo peculiaris hæc Radii dimotio distinguetur.

Faustissimi ominis erit prognosis morbi qui eò tantum quòd ignoretur, gravis evadere possit, & si quod adhuc, reductâ luxatione, remaneret impedimentum, non ab ipso morbo, sed à luxanti causâ in viciniam quoque agente, ut putâ, è contusione simultaneâ nasceretur.

Ut reducat illa Radii dimotio, puer ministræ genibus infidet, quæ brachium versùs scapulam retinet. Chirurgus alterâ manu carpum, alterâ superiorem post-brachii articulum apprehendit. Pollicem capiti Radii admoveat, cæteris digitis cubitum amplectitur, duoque ossa premit, & dimotum Radii caput ad suam restituit sedem; quòd ut obtineat, post-brachium supinari cogit & simul flectit, ita ut ad exteriorem scapulæ summmitatis partem feratur manus. Flexionis autem & supina-

7
tionis motus eodem instanti exerceantur necesse est, alioquin
aut fieri nequit, aut imperfecta remanet reductio. Radii caput
congruenter in suum rediisse articulum dignoscitur levissimo
crepitu qui digito potius quàm aure percipitur. Brevissima
deindè resolutivo quovis medicamine tincta, aut nulla quandòque
adhibetur fasciatio: nam, reductâ luxatione, derepentè cessat
omnis dolor, & posterâ die, (sæpiùs etiam antea) liberrimos
omnes articulus recuperat motus.

*HANC DISSERTATIONEM, Deo juvante, & Praside
M. PETRO-MATHURINO BOTENTUIT LANGLOIS,
Artium & Chirurgiæ Magistro, Scholarum Moderatore, an-
tiquo Scholæ practicæ Professore, Regiæ Chirurgorum Aca-
demiæ Socio, in Supremo Senatu Patrono, tueri conabitur
FRANCISCUS BONAVENTURA BOULAY, Parisiensis in
almâ Universitate Bituricensi Artium Liberalium Magister,
nuper in Parisiensi magno Nosocomio, dicto l'Hôtel-Dieu,
Chirurgus internus, Dissertationis auctor.*

*Die Sabbati 7 mensis Julii anno R. S. H. 1787, à sesqui-
secundâ post meridiem ad septimam.*

**PARISIIS,
IN REGIIS CHIRURGORUM SCHOLIS,
PRO ACTU PUBLICO,**

**ET
MAGISTERII LAUREA**

**Typis MICHAELIS LAMBERT, Regii Chirurgiæ
Collegii, necnon Academiæ Typographi, viâ Cythareâ.**

M. DCC. LXXXVII

...the ...
...the ...
...the ...
...the ...
...the ...
...the ...
...the ...

...the ...
...the ...
...the ...
...the ...
...the ...
...the ...
...the ...

...the ...
...the ...
...the ...
...the ...
...the ...
...the ...
...the ...

...the ...
...the ...
...the ...
...the ...
...the ...
...the ...
...the ...